



Na osnovu čl. 112. i 121. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03 i 22/06), direktor Federalne uprave civilne zaštite donosi

**PRAVILNIK**  
**O NAČINU RADA I FUNKCIONIRANJA ŠTABOVA**  
**I POVJERENIKA CIVILNE ZAŠTITE**

**I. OSNOVNE ODREDBE**

**Član 1.**

Ovim pravilnikom propisuje se način rada i rukovođenje štabova civilne zaštite (u daljnjem tekstu: štab CZ) i organa iz člana 111. Zakona o zaštiti i spašavanju ljudi i materijalnih dobara od prirodnih i drugih nesreća (u daljnjem tekstu: Zakon o zaštiti i spašavanju) koji vrše funkciju rukovođenja akcijama zaštite i spašavanja, kao i poslovi i zadaci i način rada povjerenika civilne zaštite koji se određuju u organima uprave, službama za upravu, mjesnim zajednicama i pravnim licima prema članu 118. stav 1. Zakona o zaštiti i spašavanju.

**Član 2.**

Odredbe ovog pravilnika primjenjuju se na štabove CZ i druge organe nadležne za rukovođenje akcijama zaštite i spašavanja i povjerenike civilne zaštite i to:

- 1) na Federalni, kantonalne i općinske štabove CZ, kao i na štabove CZ koji se osnivaju u pravnim licima i mjesnim zajednicama (član 106. i član 107. stav 1. Zakona o zaštiti i spašavanju),
- 2) na rukovodioce organa uprave i drugih organa vlasti, direktore pravnih lica i sekretare mjesne zajednice u kojima nije osnovan štab CZ (član 111. Zakona o zaštiti i spašavanju) i
- 3) na povjerenike civilne zaštite koji se određuju u naselju, dijelu naselja, stambenim zgradama, selima i zaseocima, u organima uprave i općinskim i gradskim službama za upravu, drugim organima vlasti, javnim ustanovama i drugim pravnim licima (član 118. Zakona o zaštiti i spašavanju).

Štabovi i povjerenici civilne zaštite iz stava 1. ovog člana predstavljaju dio organiziranih snaga civilne zaštite koji poslove iz svoje nadležnosti vrše u situacijama koje su utvrđene u odredbi člana 16. ovog pravilnika, a na način propisan Zakonom o zaštiti i spašavanju i ovim pravilnikom.

## II. NAČIN RADA ŠTABOVA CZ U VRŠENJU POSLOVA IZ SVOJE NADLEŽNOSTI I OSTVARIVANJE RUKOVOĐENJA AKCIJAMA ZAŠTITE I SPAŠAVANJA

### 1. Zajednička odredba

#### Član 3.

U ostvarivanju poslova iz svoje nadležnosti koji su utvrđeni u zakonskim odredbama iz odredbe člana 2. ovog pravilnika, svaki štab CZ ima dvije osnovne funkcije i to:

- 1) provođenje vlastitih priprema za uspješno vršenje operativne funkcije iz svoje nadležnosti (pripreme, obuka i osposobljavanje) i
- 2) rukovođenje akcijama zaštite i spašavanja (operativna funkcija).

Pripreme iz stava 1. tačke 1. ovog člana štabovi CZ organiziraju i provode na način reguliran u odredbama čl. 4. do 13. ovog pravilnika, a operativnu funkciju iz stava 1. tačka 2. ovog člana ostvaruju prema odredbama čl. 14. do 30. ovog pravilnika.

### 2. Popuna Federalnog, kantonalnog i općinskog štaba CZ i način njihovog rada u fazi preventivne zaštite

#### Član 4.

U skladu sa odredbama člana 113. Zakona o zaštiti i spašavanju, štabovi CZ predstavljaju kolegijalni organ koji se sastoji od komandanta, načelnika i članova štaba.

Potpuni sastav štabova CZ i način njihove popune utvrđuje se posebnim propisom, odnosno aktom koji donose slijedeći organi vlasti i to:

- 1) za Federalni štab CZ - Vlada Federacije Bosne i Hercegovine (u daljnjem tekstu: Vlada Federacije), na prijedlog Federalne uprave civilne zaštite (u daljnjem tekstu: Federalna uprava),
- 2) za kantonalni štab CZ - vlada kantona, na prijedlog kantonalne uprave civilne zaštite (u daljnjem tekstu: kantonalna uprava),
- 3) za općinski štab CZ - općinski načelnik, na prijedlog službe civilne zaštite općine ili općinsko vijeće na prijedlog općinskog načelnika.

Štabovi CZ iz stava 2. ovog člana, moraju biti tako popunjeni da budu zastupljene sve oblasti društvenog života (privredne i društvene djelatnosti) prema uslovima svakog nivoa vlasti na kojima se nalaze ti štabovi i kriterijima koji su utvrđeni u odredbama čl. 114. i 116. Zakona o zaštiti i spašavanju, s tim da se popuna osigura i prema zahtjevima koji su utvrđeni u procjeni ugroženosti Federacije, kantona i općine.

#### Član 5.

Štabovi CZ moraju biti popunjeni stručnim kadrovima, predstavnicima svih organa uprave, a prema potrebi i predstavnicima upravnih organizacija, pravnih lica i drugih institucija čija je djelatnost od značaja za zaštitu i spašavanje, s tim da općinski štabovi CZ obavezno budu popunjeni rukovodiocima općinskih službi za upravu i predstavnicima drugih općinskih organa i pravnih lica.

Popuna štaba CZ prema stavu 1. ovog člana mora osigurati takav sastav štaba koji mora biti kompetentan i sa odgovarajućim autoritetom i da u svakoj situaciji može pravilno odlučivati i donositi odgovarajuće naredbe i osigurati efikasno provođenje donešenih naredbi, odnosno efikasno i autoritativno ostvarivati funkcije rukovođenja akcijama zaštite i spašavanja ljudi i materijalnih dobara na području koje je pogođeno prirodnom ili drugom nesrećom.

#### Član 6.

U periodu od formiranja štaba CZ, pa do njegovog aktiviranja radi vršenja operativne funkcije zbog nastanka stanja prirodne ili druge nesreće, članovi štaba CZ i štab kao cjelina, provode aktivnosti na upoznavanju sa dostignutim stepenom izgradnje sistema zaštite i spašavanja, razvojnim orijentacijama i obučavaju se i osposobljavaju za efikasno i pravilno ostvarivanje funkcije rukovođenja akcijama zaštite i spašavanja iz člana 15. ovog pravilnika.

U cilju pravilnog i kontinuiranog provođenja priprema iz stava 1. ovog člana, štabovi CZ, na prijedlog organa civilne zaštite, donose svoje godišnje programe aktivnosti.

Program aktivnosti obuhvata sva pitanja koja se po Zakonu o zaštiti i spašavanju nalaze u nadležnosti štaba CZ.

#### Član 7.

Program aktivnosti štaba CZ i pitanja koja će biti predmet razmatranja štaba organizira i priprema načelnik štaba CZ putem organa civilne zaštite kojim rukovodi, s obzirom da ti organi predstavljaju stručnu službu štaba.

Priprema programa aktivnosti vrši se uz neposrednu saradnju sa komandantom štaba CZ.

Program aktivnosti štaba CZ donosi se u decembru za narednu kalendarsku godinu, a najkasnije do februara tekuće kalendarske godine.

Na osnovu utvrđenog programa aktivnosti komandant štaba, na prijedlog načelnika štaba CZ saziva sjednice i rukovodi radom sjednica i potpisuje akta koja štab CZ donosi iz svoje nadležnosti, a planirane materijale za sjednice štaba i druge uvjete za rad štaba osiguravaju organi civilne zaštite.

#### Član 8.

Pored zadataka utvrđenih u programu aktivnosti iz člana 6. ovog pravilnika, poseban oblik priprema štaba CZ za efikasno ostvarivanje operativne funkcije, predstavlja njegovo obučavanje i osposobljavanje po posebnim planovima i programima obučavanja koje, u skladu sa odredbom člana 164. stav 5. Zakona o zaštiti i spašavanju, donosi direktor Federalne uprave.

Obučavanje i osposobljavanje iz stava 1. ovog člana, obuhvata upoznavanje članova štaba CZ sa propisima iz oblasti zaštite i spašavanja, organizacijom i funkcioniranjem sistema zaštite i spašavanja, kao i provođenje praktičnog uvježbavanja načina rada i ostvarivanja operativne funkcije rukovođenja akcijama zaštite i spašavanja u fazi spašavanja i u fazi otklanjanja posljedica.

#### Član 9.

Zadatke i pitanja utvrđena u programu aktivnosti, štab CZ realizira kroz odgovarajuće metode i oblike koje utvrdi u poslovniku o svom radu iz člana 13. ovog pravilnika.

Prilikom razmatranja materijala predviđenih u programu aktivnosti, štab CZ daje odgovarajuće mišljenje, prijedloge i sugestije u cilju pravilnog rješavanja tih pitanja i daje inicijative za rješavanje određenih pitanja radi dogradnje sistema zaštite i spašavanja.

Razmatranje materijala iz stava 2. ovog člana, ima za cilj da se štab CZ upozna sa organizacijom zaštite i spašavanja na području za koje je nadležan, snagama i sredstvima civilne zaštite koja su osigurana za zaštitu i spašavanje i mjerama zaštite i spašavanja koje su planirane za provođenje zaštite i spašavanja i na taj način štab CZ stiče uvid u sve podatke koji se odnose na snage i sredstva koja može angažirati u vrijeme kada vrši svoju operativnu funkciju rukovođenja akcijama zaštite i spašavanja.

#### Član 10.

Štab CZ razmatra materijale iz člana 9. ovog pravilnika, koje pripremaju slijedeći organi civilne zaštite i to:

- 1) Federalni štab - materijale koje priprema Federalna uprava,
- 2) kantonalni štab - materijale koje priprema kantonalna uprava,
- 3) općinski štab - materijale koje priprema služba civilne zaštite općine.

Štab CZ razmatra i materijale iz oblasti zaštite i spašavanja koje pripremaju organi uprave i upravne organizacije, odnosno općinske službe za upravu, u pitanjima iz svoje nadležnosti. Materijale tih organa i službi, za sjednice štaba CZ osiguravaju organi civilne zaštite iz stava 1. ovog člana.

#### Član 11.

Organi civilne zaštite Federacije, kantona i općina, u okviru svoje redovne djelatnosti, vrše i sve poslove potrebne za pripreme štabova CZ utvrđene u njihovom programu aktivnosti i osiguravaju sve uvjete potrebne za realizaciju programiranih zadataka što obuhvata: pripremu i dostavljanje materijala članovima štaba, osiguranje prostorija za njegov rad, obavljanje administrativno-tehničkih, finansijskih i svih drugih poslova koji su potrebni za rad štaba CZ u fazi preventivne zaštite.

#### Član 12.

Organi uprave i upravne organizacije, pravna lica i druge institucije, a u općini općinske službe za upravu i druge općinske institucije (u daljnjem tekstu: organi i službe), čiji je rukovodilac ili drugo lice član štaba CZ, dužni su u svom organu ili službi osigurati uvjete za nesmetan i kontinuirani rad na zadacima koje ta lica imaju kao članovi štaba CZ.

Pod uslovima iz stava 1. ovog člana podrazumijevaju se obaveze organa i službi da redovno (kontinuirano) informiraju člana štaba CZ o svim pojavama i opasnostima koje mogu dovesti do nastanka prirodne ili druge nesreće u oblasti za koju je taj organ ili služba osnovana, odnosno sve podatke o nastaloj nesreći i posljedicama izazvanim tom nesrećom, a u vrijeme aktiviranja i funkcioniranja štaba CZ, ti organi i službe osiguravaju uslove za provođenje (izvršavanje) svih naredbi štaba CZ koje se odnose na oblast za koju su osnovani.

#### Član 13.

Štab CZ donosi svoj poslovnik o radu.

Poslovnik o radu sadrži slijedeća pitanja: unutrašnju organizaciju štaba, način pripremanja sjednica štaba, utvrđivanja dnevnog reda, zakazivanje i vođenje sjednica, način rasprave o pitanjima dnevnog reda, način odlučivanja i donošenje akata (odluke, naredbe i zaključci) iz nadležnosti štaba, način utvrđivanja zaduženja članovima štaba na realizaciji zadataka koji se utvrde u aktima štaba CZ, vođenje zapisnika i druga pitanja od značaja za organizaciju i način rada štaba CZ.

### **3. Način ostvarivanja funkcije rukovođenja akcijama zaštite i spašavanja (operativna funkcija)**

*a) Vrijeme rukovođenja akcijama zaštite i spašavanja i ovlaštenja u rukovođenju*

#### Član 14.

Operativnu funkciju rukovođenja akcijama zaštite i spašavanja štabovi CZ ostvaruju u odnosu na poslove iz svoje nadležnosti koji su utvrđeni u Zakonu o zaštiti i spašavanju i to:

- 1) Federalni štab u odnosu na ovlaštenja utvrđena u odredbama čl. 108. i 109. Zakona o zaštiti i spašavanju i drugim odredbama tog zakona u kojima su utvrđena ovlaštenja tog štaba,
- 2) kantonalni štab u odnosu na ovlaštenja utvrđena u čl. 108. i 110. Zakona o zaštiti i spašavanju i ovlaštenja koja se utvrde propisom kantona u skladu sa članom 197. stav 3. Zakona o zaštiti i spašavanju,
- 3) općinski štab u odnosu na ovlaštenja utvrđena u članu 108. Zakona o zaštiti i spašavanju i pitanja koja se popisom općinskog vijeća stave u nadležnost tog štaba, u skladu sa odredbom člana 197. stav 3. Zakona o zaštiti i spašavanju.

Štabovi CZ iz stava 1. ovog člana, rukovođenje akcijama zaštite i spašavanja, ostvaruju na području za koje je štab osnovan.

#### Član 15.

Pod rukovođenjem akcijama zaštite i spašavanja podrazumijeva se ovlaštenje štaba CZ da u fazi spašavanja i u fazi otklanjanja posljedica:

- 1) odlučuje o upotrebi i angažiranju svih snaga i sredstava civilne zaštite, kao i ljudstva i sredstava organa uprave i upravnih organizacija, pravnih lica i drugih institucija i građana i njihovih sredstava, na zadacima zaštite i spašavanja ljudi i materijalnih dobara koji su ugroženi ili nastradali od (usljed) djelovanja prirodne ili druge nesreće na području koje je pogođeno tom nesrećom;
- 2) da u toku faze spašavanja i faze otklanjanja posljedica neprekidno vrši usmjeravanje i raspoređivanje snaga i sredstava na područja na kojima je njihovo angažiranje potrebno i određuje mjere i aktivnosti koje treba preduzimati;
- 3) da usmjerava i koordinira ukupne aktivnosti na spašavanju ljudi i materijalnih dobara i otklanjanju posljedica na području pogođenom prirodnom ili drugom nesrećom.

Rukovođenje iz stava 1. ovog člana mora biti brzo i efikasno sa ciljem da se snage i sredstva civilne zaštite i druge snage i sredstva u što kraćem roku angažiraju na zadacima zaštite i spašavanja života ljudi i materijalnih dobara na područjima koja su pogođena prirodnom ili drugom nesrećom i na kojima je angažiranje snaga i sredstava neophodno. Na taj način štab CZ, rukovođenje ostvaruje cijelo vrijeme trajanja faze spašavanja i faze otklanjanja posljedica.

U okviru rukovođenja akcijama zaštite i spašavanja iz stava 2. ovog člana, štab CZ određuje zadatke angažiranim snagama civilne zaštite i drugim snagama koje trebaju preduzimati u spašavanju ljudi, a koje zadatke treba da provode na zaštiti materijalnih dobara i stalno prati i kontroliše izvršenje datih zadataka i prema potrebi, preduzima druge mjere koje će osigurati izvršenje naređenih zadataka.

#### Član 16.

Operativnu funkciju rukovođenja akcijama zaštite i spašavanja ljudi i materijalnih dobara na području koje je pogođeno, odnosno zahvaćeno prirodnom ili drugom nesrećom, štabovi CZ ostvaruju u uvjetima koji su utvrđeni u članu 134. Zakona o zaštiti i spašavanju, koji se odnose na slijedeće situacije i to:

- 1) kada zaprijeti neposredna opasnost za nastanak određene prirodne ili druge nesreće koja može da ugrozi život i zdravlje ljudi i materijalna dobra na određenom području, kako je predviđeno u odredbi člana 134. stav 2. Zakona o zaštiti i spašavanju (preventivna operativna funkcija),
- 2) kada nadležni organ vlasti proglasi nastanak prirodne ili druge nesreće na određenom području, što je u skladu sa odredbom člana 134. stav 1. Zakona o zaštiti i spašavanju (operativna funkcija u fazi spašavanja i fazi otklanjanja nastalih posljedica),
- 3) za vrijeme vježbi civilne zaštite kojima štab CZ rukovodi i u vrijeme ratnog stanja, što je u skladu sa odredbom člana 134. stav 3. Zakona o zaštiti i spašavanju.

Rad štaba civilne zaštite u uvjetima iz tačke 1. stav 1. ovog člana, po pravilu, može trajati najduže do tri dana, u kojem roku nadležni organ vlasti treba da donese odluku o proglašenju stanja prirodne ili druge nesreće ili odluku da taj štab nastavi svoj rad dok se ne otklone opasnosti koje mogu dovesti do nastanka prirodne ili druge nesreće što se u odluci konkretno određuje.

#### *b) Aktiviranje štabova CZ*

#### Član 17.

Radi ostvarivanja operativne funkcije u situacijama iz člana 16. ovog pravilnika, vrši se aktiviranje štaba CZ.

Aktiviranje štaba CZ vrši se tako što se komandant, načelnik i svi članovi štaba CZ pozivaju da odmah dođu na mjesto koje je određeno za njihov rad i da počnu obavljati svoju funkciju rukovođenja svim akcijama zaštite i spašavanja na ugroženom području za koje su osnovani.

Aktiviranje štaba CZ u svim situacijama iz člana 16. ovog pravilnika vrši se, po pravilu, na zahtjev načelnika štaba, a može i na zahtjev komandanta, dok svaki član štaba može dati inicijativu kada u oblasti za koju je član štaba nadležan dođe do pojave opasnosti koja može dovesti do nastanka određene prirodne ili druge nesreće ili je već nastala ta nesreća, pa se cijeni da je situacija takva da je funkcioniranje štaba neophodno. U takvoj situaciji, a u skladu sa odredbom člana 134. Zakona o zaštiti i spašavanju, aktiviranje štaba CZ vrši nadležni organ CZ i to:

- 1) Federalni štab - aktivira Federalna uprava,
- 2) kantonalni štab - aktivira kantonalna uprava,
- 3) općinski štab - aktivira služba civilne zaštite općine.

## Član 18.

U skladu sa odredbom člana 134. st. 1. i 2. Zakona o zaštiti i spašavanju, aktiviranje štaba CZ vrši se u svim situacijama kada zaprijeti neposredna opasnost ili pojava koja može dovesti do nastanka prirodne ili druge nesreće i koja može ugroziti život i zdravlje ljudi i materijalna dobra na određenom području ili je već nastala prirodna ili druga nesreća, pa je nadležni organ vlasti proglasio stanje te prirodne ili druge nesreće.

Aktiviranje štaba CZ se vrši radi razmatranja nastale situacije i odlučivanja o slijedećim pitanjima:

- 1) utvrđivanje procjene o postojanju uvjeta da se nadležnom organu vlasti općine, kantona i Federacije predloži donošenje odluke o proglašenju nastanka prirodne ili druge nesreće,
- 2) odlučivanje o preduzimanju odgovarajućih mjera zaštite i spašavanja iz svoje nadležnosti u cilju:
  - sprečavanja nastanka pojave ili opasnosti koja može dovesti do prirodne ili druge nesreće,
  - sprečavanja širenja pojave ili opasnosti ili ublažavanja njenog djelovanja,
  - spašavanja ugroženih ljudi i materijalnih dobara u toku djelovanja prirodne ili druge nesreće.

U svakoj situaciji iz stava 1. ovog člana, obavezno se vrši aktiviranje općinskog štaba CZ, a kantonalni štab se aktivira kada se procijeni da je stanje na ugroženom području općine takvo da je potrebna pomoć kantona ili drugih općina ili kada općinski štab zatraži pomoć kantonalnog štaba ili kada je prirodnom ili drugom nesrećom ugroženo područje dvije ili više općina na području kantona.

Polazište za predlaganje donošenja odluke o proglašenju nastanka prirodne ili druge nesreće u općini, predstavlja procjena općinskog štaba CZ da nadležne općinske službe i drugi organi općinske uprave nisu u mogućnosti samostalno, u okviru svojih redovnih nadležnosti, spriječiti nastanak prirodne ili druge nesreće niti ublažiti njeno djelovanje, odnosno nisu u mogućnosti efikasno izvršiti spašavanje ugroženih ljudi i materijalnih dobara niti otkloniti nastale posljedice.

U situaciji iz stava 1. ovog člana, Federalni štab se aktivira kada Federalna uprava procijeni da je stanje na ugroženom području takvo da je potrebna pomoć sa područja drugih kantona ili kada kantonalni štab zatraži pomoć Federalnog štaba ili kada je ugroženo područje dva ili više kantona ili područje cijele Federacije.

## Član 19.

Ako nadležni organ vlasti, na prijedlog štaba CZ donese odluku o proglašenju stanja prirodne ili druge nesreće, taj štab nastavlja svoj rad i ostvaruje svoju funkciju rukovođenja akcijama zaštite i spašavanja na ugroženom području i tu funkciju vrši neprekidno dok isti organ ne donese odluku o prestanku stanja prirodne ili druge nesreće.

U slučaju da nadležni organ vlasti, ne prihvati prijedlog štaba CZ da proglasi stanje prirodne ili druge nesreće, u tom slučaju taj organ vlasti odlučuje da li ima potrebe da štab CZ nastavi svoj rad u roku koji se utvrdi prema odredbi člana 16. stav 2. ovog pravilnika.

*c) Operativno djelovanje u rukovođenju akcijama zaštite i spašavanja*

Član 20.

Štab CZ koji je aktiviran prema odredbi člana 17. ovog pravilnika, na prvoj sjednici nakon donošenja odluke iz člana 19. stav 1. ovog pravilnika, vrši procjenu nastale situacije i u skladu sa procijenjenom situacijom postupa prema odredbi člana 18. stav 1. ovog pravilnika. Tom aktivnošću počinje operativno djelovanje štaba civilne zaštite koje štab ostvaruje putem rukovođenja akcijama zaštite i spašavanja na području na kojem je nastala prirodna ili druga nesreća, odnosno na kojem prijete ozbiljna opasnost od nastanka prirodne ili druge nesreće.

Član 21.

Rukovođenje akcijama zaštite i spašavanja, štab CZ, u načelu, ostvaruje održavanjem sjednica štaba na kojima odlučuje o upotrebi snaga i sredstava koje treba angažirati, naređuje mjere zaštite i spašavanja koje treba provoditi i određuje organe uprave i druge institucije i pravna lica koji su dužni izvršiti naređene mjere i zadatke.

Član 22.

U procesu rukovođenja akcijama zaštite i spašavanja, radom štaba CZ rukovodi komandant štaba, zakazuje i vodi sjednice štaba, predlaže dnevni red i potpisuje sva akta štaba.

U slučaju odsutnosti komandanta štaba CZ, a neophodno je održati sjednicu štaba radi odlučivanja o određenim pitanjima, sjednicu zakazuje i vodi načelnik štaba i postupa u skladu sa odredbom člana 115. Zakona o zaštiti i spašavanju.

Ako u određenoj situaciji ne postoji kvorum za punovažno odlučivanje štaba CZ, a nužno je da štab odluči o određenom pitanju ili više pitanja neophodnih za provođenje akcija zaštite i spašavanja ljudi i materijalnih dobara na ugroženom području, u tom slučaju, štab može odlučivati u sastavu u kojem se nalazi, s tim što je načelnik štaba dužan na prvoj sjednici štaba kada postoji kvorum za odlučivanje, upoznati štab CZ o donešenim odlukama ili naredbama ili zaključcima, kako bi štab verificovao te akte.

Član 23.

U procesu rukovođenja akcijama zaštite i spašavanja, štab CZ, donošenje naredbi i angažiranje potrebnih snaga i sredstava i provođenje mjera zaštite i spašavanja, vrši na osnovu podataka koje dobija o stanju na ugroženom području. U tom cilju, štab CZ koristi informacijsko-komunikacijsku podršku operativnih centara civilne zaštite, koji osiguravaju interno, eksterno, govorno i pisano komuniciranje sa svim učesnicima u akcijama zaštite i spašavanja u koordinaciji prijema i prenošenja svih odluka, naredbi i izvještaja na području koje je pogođeno prirodnom ili drugom nesrećom.

Prikupljanje podataka sa ugroženog područja i njihovo stalno dostavljanje štabu CZ koji na ugroženom području rukovodi akcijama zaštite i spašavanja, mora biti pohranjeno u informacijsku bazu i dostavljeno precizno, tačno, sistematično i kontinuirano (svakodnevno), po pravilu, svaka dva sata i tako se postupa sve dok se provode akcije na spašavanju ugroženih ljudi i materijalnih dobara, odnosno dok se provode akcije na otklanjanju nastalih posljedica.



Prikupljanje i dostavljanje podataka štabu CZ prema st. 1 i 2. ovog člana, vrše operativni centri civilne zaštite (u daljnjem tekstu: operativni centar) i to:

- 1) za Federalni štab - Federalni operativni centar.
- 2) za kantonalni štab - kantonalni operativni centar,
- 3) za općinski štab - općinski operativni centar,

Prikupljanje i dostavljanje podataka štabu CZ, operativni centri iz stava 3. ovog člana vrše na način propisan u propisu koji se donosi na osnovu člana 158. Zakona o zaštiti i spašavanju, a organi uprave civilne zaštite dužni su osigurati neprekidan rad tih centara (24 sata) tokom trajanja situacija iz člana 16. ovog pravilnika, kako je utvrđeno u članu 151. stav 4. Zakona o zaštiti i spašavanju.

#### Član 24.

Sve naredbe štaba CZ kojima se odlučuje o angažiranju (upotrebi) snaga i sredstava civilne zaštite i provođenju mjera zaštite i spašavanja koje treba provoditi na ugroženom području, zasnivaju se na planovima zaštite i spašavanja i to:

- 1) naredbe Federalnog štaba - na Federalnom planu zaštite i spašavanja.
- 2) naredbe kantonalnog štaba - na kantonalnom planu zaštite i spašavanja,
- 3) naredbe općinskog štaba - na općinskom planu zaštite i spašavanja,

Polazište za angažiranje snaga i sredstava i mjera zaštite i spašavanja prema planovima iz stava 1. ovog člana, predstavljaju podaci o stanju na ugroženom području koje štab CZ neprekidno dobija na način predviđen u odredbi člana 23. ovog pravilnika.

*d) Način provođenja naredbi štaba CZ*

#### Član 25.

Naredbu štaba CZ koja se odnosi na obaveze organa uprave ili upravne organizacije neposredno provode rukovodioci tih organa i organizacija, a naredbu štaba koja se odnosi na zadatke pravnih lica ili druge institucije provode rukovodioci (direktori) tih lica i institucija.

Realizaciju naredbe štaba CZ iz stava 1. ovog člana osiguravaju članovi štaba i to:

- 1) naredbe koje se odnose na organe uprave i upravne organizacije provode rukovodioci tih organa i organizacija, uz neposredno učešće člana štaba iz organa uprave ili upravne organizacije na koje se naredba odnosi,
- 2) naredbe koje se odnose na pravna lica i druge institucije i organe uprave i upravne organizacije koje nemaju svog člana štaba izvršavaju rukovodioci tih organa i pravnih lica uz neposredno učešće člana štaba koga odredi štab CZ.

Rukovodioci organa, organizacija i pravnih lica iz stava 1. ovog člana, provođenje naredbe štaba CZ vrše tako što koriste svoja ovlaštenja koja imaju kao rukovodioci organa uprave i upravnih organizacija, a rukovodioci pravnih lica i drugih institucija koriste ovlaštenja koja imaju kao rukovodioci tih pravnih lica i institucija. Rukovodioci tih organa i pravnih lica, provođenje naredbe

štaba CZ vrše u saradnji sa članom štaba kojeg je štab odredio da osigura provođenje naredbe u tim organima, organizacijama i pravnim licima i drugim institucijama.

#### Član 26.

Štab CZ koji je aktiviran, funkcionira neprekidno od dana aktiviranja do dana kada nadležni organ vlasti donese odluku o prestanku stanja prirodne ili druge nesreće, a u situaciji iz tačke 1. člana 15. ovog pravilnika, štab funkcionira dok se ne otkloni opasnost zbog koje je štab aktiviran, a najduže do roka koji odredi organ vlasti nadležan za proglašavanje stanja prirodne ili druge nesreće.

*e) Izvještavanje i kontrola izvršenih zadataka*

#### Član 27.

Izvještavanje i kontrola izvršenih zadataka, kao sastavni dijelovi procesa rukovođenja akcijama zaštite i spašavanja, vrši se radi toga, da štab CZ u svakom trenutku ima uvid u stanje posljedica po ljude, životinje, materijalna dobra i okolinu na pogođenom području, realizaciju postavljenih zadataka, stanje kod ljudstva angažiranog u spasilačkim aktivnostima, način motivacije, kvalitet saradnje i koordinacije u zaštiti i spašavanju, potrebe za novim snagama i sredstvima, odnosno izmjenama datih zadataka i drugim potrebama na pogođenom području.

U toku rukovođenja akcijama zaštite i spašavanja, u situacijama iz člana 16. ovog pravilnika, štab CZ je dužan sedmično, a prema potrebi i češće informirati organ vlasti koji je proglasio stanje prirodne ili druge nesreće o stanju na ugroženom području, snagama i sredstvima koja su angažirana, problemima koji postoje i prijedlozima mjera koje bi, u granicama svojih ovlaštenja trebao donijeti taj organ vlasti, a koje su potrebne za provođenje aktivnosti na području pogođenom prirodnom ili drugom nesrećom.

Izvještaj iz stava 1. ovog člana podnosi se u pismenoj formi, a komandant štaba CZ može redovno i usmeno da informira organ vlasti koji je proglasio stanje prirodne ili druge nesreće o stanju na terenu, aktivnostima koje se provode i problemima koji postoje.

*f) Obavljanje stručnih i administrativnih poslova za potrebe štaba CZ*

#### Član 28.

Sve stručne, administrativno-tehničke i druge poslove potrebne za rad štaba CZ organiziraju i vrše odgovarajući organi uprave civilne zaštite kao stručne službe štaba CZ.

Sva pitanja koja se odnose na zakazivanje sjednica štaba CZ, rada na sjednici, načina rada i druga pitanja koja se odnose na te sjednice, uređuju se poslovníkom o radu štaba iz člana 13. ovog pravilnika.

### **4. Akti koje donose štabovi CZ**

#### Član 29.

U vršenju poslova iz svoje nadležnosti, štabovi CZ donose odluke, naredbe i zaključke. Te akte štab CZ donosi radi odlučivanja o sljedećim pitanjima i to:

1) odluke se donose onda kada odlučuje o pitanjima koja se odnose na raspodjelu sredstava osiguranih za finansiranje rada štaba, kada odlučuje o raspodjeli sredstava iz člana 180. Zakona o zaštiti i spašavanju za koja je nadležan, kada odlučuje o pružanju pomoći općinama, kantonima, odnosno susjednim općinama i susjednim kantonima u pogledu angažiranja određenih snaga i sredstava civilne zaštite ili pružanja pomoći Republici Srpskoj, Brčko Distriktu BiH i susjednim i drugim državama,

2) naredbe se donose u svim slučajevima kada odlučuje o upotrebi, odnosno angažiranju snaga i sredstava civilne zaštite i drugih snaga zaštite i spašavanja kojima raspolažu općine, kantoni i Federacija, pravna lica i druge institucije i građani, kada rukovodi akcijama zaštite i spašavanja u svim situacijama koje su predviđene u odredbama člana 16. ovog pravilnika i kada određuje zadatke, odnosno mjere zaštite i spašavanja koje će izvršavati angažirane snage civilne zaštite i drugi subjekti u akcijama zaštite i spašavanja,

3) zaključak se donosi kada se utvrđuje određeni stav o pitanjima iz oblast zaštite i spašavanja koja se nalaze u nadležnosti štaba CZ i pitanjima iz unutrašnjih odnosa štaba, kao i utvrđivanja zadataka za članove štaba i stručnu službu štaba, a mišljenja, prijedloge i primjedbe daje na materijale koje štab CZ razmatra iz člana 9. ovog pravilnika i u drugim slučajevima u kojima se ne odlučuje odlukom, odnosno naredbom.

### Član 30.

Upotreba snaga i sredstava civilne zaštite i angažiranje snaga i sredstava pravnih lica, organa uprave i drugih organa uprave i građana, na zadacima zaštite i spašavanja vrši se naredbom štaba CZ, koja se donosi u pismenoj formi.

Naredbom iz stava 1. ovog člana sadrži:

- 1) naziv i sjedište štaba CZ,
- 2) broj i datum donošenja naredbe,
- 3) preambulu (zakonski osnov) za donošenje naredbe,
- 4) snage civilne zaštite koje se angažiraju i područje na kojem se angažiraju (službe zaštite i spašavanja, jedinice i povjerenici civilne zaštite i snage civilne zaštite pravnih lica) i zadatke koje će izvršavati te snage i vrijeme njihovog izvršenja,
- 5) materijalno-tehnička sredstva i oprema pravnih lica i drugih institucija i građana koja se angažiraju u akcijama zaštite i spašavanja na ugroženom području,
- 6) mjere zaštite i spašavanja koje treba provoditi na ugroženom području,
- 7) rok angažiranja snaga i sredstava iz tač. 4. i 5. stav 2. ovog člana,
- 8) organi uprave i drugi organi i pravna lica koji su dužni učestvovati na realizaciji zadataka koje naredi štab i obaveze za rukovodioce tih organa i pravnih lica da redovno informiraju komandanta i načelnika štaba CZ o realizaciji zadataka utvrđenih u naredbi,
- 9) zaduženja za članove štaba koji će pratiti i osiguravati realizaciju utvrđenih zadataka i osigurati angažiranje predviđenih snaga i sredstava na ugroženom području,

- 10) organ uprave ili drugi organ koji će osigurati finansijska sredstva potrebna za realizaciju zadataka utvrđenih u naredbi i
- 11) druge zadatke za koje se procijeni da su potrebni.

Naredbu štaba CZ potpisuje komandant štaba i ovjerava pečatom štaba.

Naredba se dostavlja rukovodiocima organa uprave i upravnih organizacija, odnosno općinskih službi za upravu i drugih institucija i rukovodiocima pravnih lica za koja su u naredbi utvrđeni odgovarajući zadaci koje oni moraju izvršiti.

## **5. Proglašavanje stanja prirodne ili druge nesreće i prestanka te nesreće**

### **Član 31.**

U cilju aktiviranja štabova CZ i preduzimanja mjera i aktivnosti na zaštiti i spašavanju ljudi i materijalnih dobara u uvjetima predviđenim u članu 16. stav 1. tač. 1. i 2. ovog pravilnika, vrši se donošenje odluke o proglašenju stanja prirodne ili druge nesreće na području koje je pogođeno tom nesrećom.

U skladu sa odredbama člana 24. tačka 6), člana 27. tačka 8) i člana 29. tačka 7) Zakona o zaštiti i spašavanju, odluku iz stava 1. ovog člana donose slijedeći organi vlasti i to:

- 1) Vlada Federacije, na prijedlog Federalnog štaba,
- 2) organ vlasti kantona određen propisom kantona, na prijedlog kantonalnog štaba,
- 3) organ vlasti općine određen propisom općinskog vijeća, na prijedlog općinskog štaba.

### **Član 32.**

Odlukom o proglašenju stanja prirodne ili druge nesreće utvrđuju se slijedeća pitanja:

- 1) preambula za donošenje odluke,
- 2) naziv organa koji je donio odluku,
- 3) naziv organa koji je predložio donošenje odluke,
- 4) datum donošenja odluke,
- 5) naziv prirodne ili druge nesreće,
- 6) određuje područje koje je ugroženo prirodnom ili drugom nesrećom,
- 7) određuju organi uprave, upravne organizacije, pravna lica i druge institucije, snage i sredstva civilne zaštite, službe zaštite i spašavanja i kategorije građana koje štab CZ može angažirati na zadacima zaštite i spašavanja,
- 8) određuju materijalno-tehnička sredstva i oprema civilne zaštite, pravnih lica i organa vlasti i građana koja štab CZ može angažirati u akcijama zaštite i spašavanja,

- 9) iznos sredstava iz budžeta i drugih izvora koja će se kao akontacija moći koristiti u akcijama zaštite i spašavanja i organ uprave koji će biti zadužen za rješavanje tih pitanja,
- 10) određuje štab CZ koji će rukovoditi akcijama zaštite i spašavanja na ugroženom području u skladu sa ovlaštenjima koja taj štab ima prema Zakonu o zaštiti i spašavanju,
- 11) obaveze za rukovodioce organa uprave i upravnih organizacija, odnosno rukovodioce općinskih službi za upravu i rukovodioce pravnih lica i drugih institucija iz tačke 6. stav 1. ovog člana da su dužni osigurati provođenje svih naredbi štaba CZ,
- 12) druge zadatke za koje se cijeni da se trebaju vršiti u toku provođenja aktivnosti na zaštiti i spašavanju ljudi i materijalnih dobara i otklanjanju nastalih posljedica,
- 13) vrijeme važenja donešene odluke.

Odluka iz stava 1. ovog člana se odmah po donošenju, saopćava putem sredstava javnog informiranja, a onda objavljuje u službenim novinama ili službenom glasniku općine, kantona ili Federacije, zavisno od toga koji je organ donio tu odluku, s tim da se primjerak odluke mora dostaviti štabu CZ koji će na ugroženom području rukovoditi akcijama zaštite i spašavanja radi postupanja po odluci.

### Član 33.

Prestanak stanja prirodne ili druge nesreće utvrđuje se odlukom.

Odluku o prestanku stanja prirodne ili druge nesreće donosi isti organ vlasti koji je donio odluku o proglašenju stanja prirodne ili nesreće.

Odluka iz stava 1. ovog člana sadrži:

- 1) preambulu za donošenje odluke,
- 2) naziv odluke o proglašenju stanja prirodne ili druge nesreće, koja se stavlja van snage, njen broj i datum donošenja,
- 3) datum donošenja odluke o prestanku stanja prirodne ili druge nesreće,
- 4) potrebu nastavka rada štaba CZ i nakon donošenja odluke o prestanku stanja prirodne ili druge nesreće i rok do kada će raditi štab CZ, ako je potrebno da štab CZ nastavi svoj rad,
- 5) prestanak rada angažiranih snaga i sredstava, odnosno potrebu nastavka rada potrebnog broja jedinica civilne zaštite i službi zaštite i spašavanja koje su bile angažirane na zaštiti i spašavanju do određenog roka,
- 6) obaveze za organe uprave, odnosno općinske službe za upravu da okviru svoje redovne djelatnosti vrše i dodatne poslove koji se odnose na otklanjanje svih posljedica koje su nastale od prirodne ili druge nesreće i rok za obavljanje tih poslova,
- 7) rok komisiji za procjenu štete, da u skladu sa svojim nadležnostima izvrši sve poslove na procjeni štete na pogođenom području i
- 8) druge zadatke za koje se procijeni da su potrebni.

Odluka iz stava 1. ovog člana odmah se saopćava putem sredstava javnog informiranja i objavljuje u službenim novinama ili službenom glasniku općine, kantona, odnosno Federacije, s tim da se primjerak odluke mora obavezno dostaviti štabu CZ koji je na ugroženom području rukovodio akcijama zaštite i spašavanja radi realizacije donešene odluke.

### III. NAČIN RADA ŠTABOVA CZ MJESNIH ZAJEDNICA I PRAVNIH LICA I DRUGIH ORGANA U RUKOVOĐENJU AKCIJAMA ZAŠTITE I SPAŠAVANJA

#### 1. Formiranje i način rada štaba CZ mjesne zajednice

##### Član 34.

Štab CZ može se formirati u većim mjesnim zajednicama za koje se procijeni da je njegovo formiranje neophodno i ako je takva obaveza utvrđena u procjeni ugroženosti općine.

Štab CZ iz stava 1. ovog člana formira općinski načelnik na prijedlog službe civilne zaštite općine.

Štab CZ koji se formira u mjesnoj zajednici nadležan je da rukovodi akcijama zaštite i spašavanja na području mjesne zajednice za koju je osnovan.

U rukovođenju akcijama zaštite i spašavanja, štab CZ mjesne zajednice ima ovlaštenja određena u odredbi člana 108. Zakona o zaštiti i spašavanju. Ovlaštenja utvrđena u toj zakonskoj odredbi, štab CZ mjesne zajednice ostvaruje putem vršenja operativne funkcije u situacijama koje su utvrđene u članu 16. ovog pravilnika.

Operativnu funkciju iz stava 4. ovog člana, štab CZ mjesne zajednice vrši na način što rukovođenje akcijama zaštite i spašavanja ostvaruje u odnosu na angažiranje građana, kućnih savjeta, sekretara mjesne zajednice, kao i provođenje naredbi općinskog štaba civilne zaštite koje se odnose na aktivnosti štaba mjesne zajednice.

##### Član 35.

U cilju stvaranja uvjeta da štab CZ mjesne zajednice može efikasno vršiti operativnu funkciju, služba civilne zaštite općine organizira i provodi pripreme tog štaba za vršenje te funkcije kroz organiziranje i provođenje obuke i osposobljavanja.

Obuka i osposobljavanje štaba CZ mjesne zajednice, vrši se po planu i programu kojeg utvrđuje direktor Federalne uprave.

Realizaciju plana i programa iz stava 2. ovog člana, organizira i provodi služba civilne zaštite općine uz učešće sekretara mjesne zajednice i općinske službe za upravu koja je nadležna za mjesne zajednice.

Obuka i osposobljavanje štaba CZ mjesne zajednice obuhvata sva pitanja iz njegove nadležnosti utvrđena u članu 34. stav 2. ovog pravilnika.

##### Član 36.

U okviru priprema za vršenje operativne funkcije, štab CZ mjesne zajednice povremeno, prema potrebi, održava sjednice štaba koje planira, priprema i organizira služba civilne zaštite općine.

Na sjednicama iz stava 1. ovog člana, štab CZ mjesne zajednice razmatra sva pitanja iz svoje nadležnosti i osposobljava se o načinu svog rada u vrijeme ostvarivanja operativne funkcije (načinu prikupljanja podataka sa ugroženog područja, načinu donošenja naredbi i načinu provođenja donešenih naredbi), kao i načinu provođenja naredbi općinskog štaba civilne zaštite koje se odnose na štabove CZ mjesnih zajednica.

#### Član 37.

Operativnu funkciju, štab CZ mjesne zajednice ostvaruje od momenta aktiviranja i početka vršenja funkcije rukovođenja akcijama zaštite i spašavanja na području mjesne zajednice, do momenta kada općinski štab civilne zaštite naredi prestanak rada štaba CZ mjesne zajednice.

Aktiviranje štaba CZ mjesne zajednice vrši općinski štab civilne zaštite kada bude aktivan, a u situaciji iz člana 16. tačka 1. ovog pravilnika, aktiviranje štaba civilne zaštite mjesne zajednice vrši načelnik općinskog štaba, putem službe civilne zaštite općine.

#### Član 38.

Rukovođenje akcijama zaštite i spašavanja, štab CZ mjesne zajednice ostvaruje na području mjesne zajednice uz neposrednu saradnju i po uputama, odnosno naredbama općinskog štaba civilne zaštite.

Rukovođenje iz stava 1. ovog člana, štab civilne zaštite mjesne zajednice ostvaruje tako što naređuje preduzimanje mjera zaštite i spašavanja koje su za mjesnu zajednicu utvrđene u općinskom planu zaštite i spašavanja, a prema potrebama koje postoje na području mjesne zajednice.

## **2. Način rada štaba CZ pravnog lica**

#### Član 39.

Štab CZ koji se, u skladu sa odredbama člana 107. st. 1. i 3. Zakona o zaštiti i spašavanju, osnuje u pravnom licu, nadležan je da rukovodi akcijama zaštite i spašavanja u objektima i poslovnim prostorima koji pripadaju pravnom licu, te na području na kojem pravno lice vrši svoju redovnu djelatnost.

Nadležnost štaba CZ iz stava 1. ovog člana, utvrđuje se općim aktom pravnog lica i određuju situacije kada taj štab vrši svoje funkcije, s tim da je dužan funkcionirati u svim slučajevima kada to naredi štab CZ općine, kantona i Federacije.

#### Član 40.

U cilju osposobljavanja štaba CZ za njegovo efikasno vršenje operativne funkcije putem rukovođenja akcijama zaštite i spašavanja, pravno lice koje je osnovalo taj štab, dužno je planirati i provoditi obuku i osposobljavanje tog štaba.

Obuka i osposobljavanje štaba CZ odnosi se na sva pitanja koja se opštim aktom pravnog lica stave u nadležnost tog štaba.

Planiranje, organiziranje i provođenje obuke i osposobljavanja štaba CZ vrši stručna služba pravnog lica koja se odredi opštim aktom pravnog lica, kojim je regulirano osnivanje tog štaba u saradnji sa službom civilne zaštite općine.

#### Član 41.

Operativnu funkciju u zaštiti i spašavanju, štab CZ pravnog lica ostvaruje u situaciji kada zaprijeti neposredna opasnost od nastanka prirodne ili druge nesreće koja može ugroziti život i zdravlje zaposlenika i materijalna dobra pravnog lica, odnosno u situaciji kada nastane ta nesreća. U tim slučajevima, taj štab, operativnu funkciju ostvaruje putem rukovođenja akcijama zaštite i spašavanja dok te situacije postoje i dok se ne otklone sve posljedice nastale djelovanjem prirodne ili druge nesreće.

Aktiviranje štaba CZ u uvjetima iz stava 1. ovog člana, vrši direktor pravnog lica ili drugi organ koji je određen općim aktom pravnog lica.

Ako je prirodna ili druga nesreća ugrozila dio ili cijelo područje općine, u tom slučaju, štab CZ pravnog lica, pored rukovođenja akcijama zaštite i spašavanja u pravnom licu, dužan je postupiti i po naredbama štaba CZ koji rukovodi akcijama zaštite i spašavanja na ugroženom području općine.

### **3. Način rukovođenja akcijama zaštite i spašavanja u organima uprave i drugim organima vlasti**

#### Član 42.

U skladu sa odredbama člana 111. tačka 1. Zakona o zaštiti i spašavanju, rukovođenje akcijama zaštite i spašavanja u organima uprave i drugim organima vlasti, odnosno općinskim službama za upravu (u daljnjem tekstu: organi uprave) vrše rukovodioci tih organa putem povjerenika civilne zaštite koji se određuju prema članu 118. stav 2. Zakona o zaštiti i spašavanju.

Rukovođenje akcijama zaštite i spašavanja, rukovodioci organa uprave iz stava 1. ovog člana, ostvaruju u odnosu na zaštitu i spašavanje državnih službenika i namještenika, službene dokumentacije, opreme i drugih sredstava rada u objektima i prostorima koje koriste organi uprave za svoj rad.

Operativnu funkciju iz stava 1. ovog člana, rukovodilac organa uprave ostvaruje u situacijama iz člana 16. ovog pravilnika, a od momenta kada nadležni organ vlasti proglasi nastanak prirodne ili druge nesreće na području na kojem se nalaze objekti i zgrade u kojima rade organi uprave i drugi organi vlasti.

#### Član 43.

Kada nadležni organ vlasti proglasi nastanak prirodne ili druge nesreće na području na kojem se nalaze objekti u kojima su smješteni organi uprave, u tom slučaju rukovodilac organa uprave odmah vrši aktiviranje povjerenika civilne zaštite iz stava 1. člana 42. ovog pravilnika i naređuje da oni počnu vršiti poslove iz svoje nadležnosti koji su predviđeni u članu 49. tač. 2. i 3. ovog pravilnika.

Poslove iz svoje nadležnosti, povjerenici civilne zaštite vrše pod neposrednim nadzorom rukovodioca organa uprave i postupaju prema njegovim uputama i naredbama, s tim što su dužni postupiti i po naredbama štaba CZ općine, kantona ili Federacije koji na ugroženom području rukovodi akcijama zaštite i spašavanja.



#### **4. Način rukovođenja akcijama zaštite i spašavanja u pravnom licu u kojem nije formiran štab CZ**

##### **Član 44.**

Organiziranje i ostvarivanje rukovođenja akcijama zaštite i spašavanja u pravnim licima u kojima nije formiran štab CZ, vrši rukovodilac ili drugi organ određen općim aktom pravnog lica putem povjerenika civilne zaštite, kako je utvrđeno u odredbi člana 111. tačka 2. Zakona o zaštiti i spašavanju, a koje postavlja rukovodilac, prema članu 119. tačka 2. tog Zakona.

Kada zaprijeti neposredna opasnost za nastanak prirodne ili druge nesreće koja može da ugrozi ljude i objekte i drugu imovinu pravnog lica i u situaciji kada nadležni organ vlasti proglasi nastanak te nesreće na području na kojem se nalaze objekti i imovina pravnog lica, direktor pravnog lica aktivira povjerenike civilne zaštite iz stava 1. ovog člana.

##### **Član 45.**

Kada se u pravnom licu izvrši aktiviranje povjerenika civilne zaštite oni odmah počinju vršiti poslove iz svoje nadležnosti koji su utvrđeni u odredbi člana 54. ovog pravilnika.

Poslove i zadatke iz svoje nadležnosti, povjerenici civilne zaštite vrše pod neposrednim nadzorom i uputama i naredbama rukovodioca pravnog lica ili drugog ovlaštenog organa pravnog lica, a dužni su da postupaju i po naredbama štaba CZ općine, kantona i Federacije koji na ugroženom području rukovode akcijama zaštite i spašavanja.

##### **Član 46.**

U cilju uspješnog i efikasnog vršenja poslova u uvjetima iz člana 45. ovog pravilnika, pravno lice je obavezno planirati i provoditi obuku i osposobljavanje povjerenika civilne zaštite.

Obuka i osposobljavanje odnosi se na sve poslove za koje je nadležan povjerenik civilne zaštite koji su utvrđeni u odredbama člana 54. ovog pravilnika. Ta obuka i osposobljavanje organizira se i provodi u saradnji sa službom civilne zaštite općine i kantonalnom upravom civilne zaštite.

#### **IV. POVJERENICI CIVILNE ZAŠTITE, NJIHOVI POSLOVI I NAČIN RADA**

##### **1. Zajedničke odredbe**

##### **Član 47.**

Povjerenici CZ spadaju u organiziranu strukturu civilne zaštite i u skladu sa odredbom člana 118. stav 1. Zakona o zaštiti i spašavanju, određuju se u naselju, dijelu naselja, stambenim zgradama, selima i zaseocima, u organima uprave i službama za upravu općina, drugim organima i ustanovama i pravnim licima u kojima se ne osniva štab CZ.

##### **Član 48.**

Sve aktivnosti organa uprave, službi za upravu i drugih organa i pravnih lica koje se odnose na određivanje povjerenika civilne zaštite, utvrđivanje njihovih poslova i načina rada, obučavanja i opremanja vrši se u skladu sa odredbama čl. 118. do 120. Zakona o zaštiti i spašavanju i odredbama čl. 49. do 57. ovog pravilnika.

## Član 49.

Povjerenici civilne zaštite iz člana 47. ovog pravilnika, poslove iz svoje nadležnosti koji se odnose na zaštitu i spašavanje ljudi i materijalnih dobara od prirodnih i drugih nesreća vrše u okviru tri faze i to:

- 1) u fazi preventivne zaštite koja se odnosi na preduzimanje mjera zaštite i spašavanja kojima se može uticati na sprečavanje nastanka prirodne ili druge nesreće ili ublažavanje djelovanja te nesreće (preventivne mjere),
- 2) u fazi spašavanja ugroženih ljudi i materijalnih dobara tokom djelovanja prirodne ili druge nesreće kada preduzimaju operativne mjere zaštite i spašavanja kojima se vrši spašavanje ugroženih ljudi i materijalna dobra (operativne mjere),
- 3) u fazi saniranja posljedica koje su nastale od prirodne ili druge nesreće kada preduzimaju mjere i aktivnosti kojima se vrši otklanjanje i saniranje nastalih posljedica (sanacione mjere).

## 2. Određivanje povjerenika civilne zaštite

### Član 50.

Povjerenike civilne zaštite postavljaju i razrješavaju organi utvrđeni u članu 119. Zakona o zaštiti i spašavanju, što se vrši rješenjem koje sadrži:

- 1) za povjerenike civilne zaštite u organima uprave, službama za upravu i drugim organima vlasti i ustanovama (upravne organizacije): lične podatke povjerenika, osnovne zadatke, način vršenja poslova, saradnja sa rukovodiocem organa i objekte i prostor za koji je zadužen,
- 2) za povjerenike civilne zaštite u pravnom licu (privredne i društvene djelatnosti): lične podatke povjerenika, osnovne zadatke, način vršenja poslova, objekti (upravne, poslovne zgrade i drugi objekti) za koje su zaduženi i način ostvarivanja saradnje sa direktorom, odnosno drugim organom koji je određen općim aktom za rukovođenje u zaštiti i spašavanju,
- 3) za povjerenike civilne zaštite koji se određuju za naselje, dio naselja, selo, zaselak i stambene zgrade: lične podatke povjerenika (ime, prezime i adresa), naselje, dio naselja, selo, zaselak i stambene zgrade za koje se zadužuje, osnovne zadatke za koje je nadležan, organi sa kojima ostvaruje saradnju u vršenju poslova i obaveze službe civilne zaštite općine u vezi organiziranja i načina rada povjerenika civilne zaštite.

### Član 51.

Prilikom određivanja broja povjerenika na području mjesne zajednice za naseljena mjesta i stambene zgrade, u obzir se uzima broj stanovnika, gustoća naseljenosti, vrste stambenih jedinica i njihov raspored (lokacije) i druge činjenice koje mogu imati uticaj na efikasan rad povjerenika, a broj povjerenika u organu uprave i drugim organima vlasti, odnosno pravnom licu, određuje se prema broju i lokaciji upravnih i poslovnih zgrada i drugih objekata i broju zaposlenih lica.

Polazeći od kriterija iz stava 1. ovog člana, broj povjerenika CZ određuje se na slijedeći način i to:

- 1) za područje mjesne zajednice određuje se tako, da se jedan povjerenik odredi za jednu ili više manjih stambenih zgrada, za jednu višespratnicu ili određen broj spratova, za jedno naselje ili dio

naselja ili ulicu ili za određen broj stambenih zgrada, a u naselju seoskog tipa, jedan povjerenik se može odrediti za svaki zaselak ili selo ili dio sela ili cijelo selo sa manjim brojem domaćinstava;

2) za organe uprave i druge organe vlasti određuje se jedan povjerenik za svaki taj organ, osim organa uprave koji imaju veliki broj zaposlenih lica i ako su smješteni u više zgrada i na različitim lokacijama kada se može odrediti više povjerenika, odnosno po jedan povjerenik za svaki lokalitet;

3) za pravna lica i druge institucije, broj povjerenika se određuje analogno odredbi tačke 2) stav 2. ovog člana.

Broj povjerenika treba odrediti tako da svaki povjerenik može sve poslove iz svoje nadležnosti za koje je zadužen u svakoj situaciji koja može nastati pojavom prirodne ili druge nesreće, vršiti blagovremeno, pravilno, kvalitetno i efikasno.

### **3. Poslovi i zadaci povjerenika civilne zaštite**

#### Član 52.

Povjerenici civilne zaštite koji su određeni za naselje ili dio naselja ili ulicu ili selo i zaselak, nadležni su da na području za koje su zaduženi obavljaju sve organizacijske i druge mjere koje se odnose na pripreme građana da se lično osposobe za preduzimanje svih mjera zaštite i spašavanja kojima mogu obezbijediti zaštitu vlastitog života i zdravlja i života i zdravlja svoje porodice i zaštititi i spasiti svoju imovinu, a istovremeno da mogu uzeti i učešće na pružanju pomoći u spašavanju nastradalih i ugroženih ljudi i materijalnih dobara na ugroženom području.

Ostvarivanje cilja iz stava 1. ovog člana, povjerenici civilne zaštite postižu tako što neposredno obavljaju sljedeće poslove i zadatke:

1) u fazi preventivne zaštite iz člana 49. tačka 1. ovog pravilnika povjerenik provodi sljedeće preventivne mjere:

- preduzima aktivnosti da se građani upoznaju o vrstama prirodnih i drugih nesreća koje, prema procjeni ugroženosti općine, mogu ugroziti područje na kojem građani žive i mjerama koje bi oni lično trebali preduzimati radi sprečavanja nastanka određene prirodne ili druge nesreće ili da se ublaži njeno djelovanje;
- preduzima aktivnosti da se građani upoznaju o tome koja propisana sredstva za ličnu zaštitu treba da nabave, kao i druga sredstva koja su neophodna za preduzimanje mjera u fazi djelovanja prirodne ili druge nesreće i u vezi s tim, daju upute za način smještaja i čuvanja tih sredstava;
- u saradnji sa službom civilne zaštite općine, preduzima aktivnosti da građani učestvuju u obučavanju koje se odnosi na pripremanje i provođenje lične i uzajamne zaštite i način provođenja mjera zaštite i spašavanja predviđene u planu i programu obučavanja stanovništva i o tim pitanjima vodi odgovarajuću evidenciju;
- učestvuje u pripremanju i izvođenju vježbi i drugih praktičnih oblika obuke iz oblasti zaštite i spašavanja i samozaštite;
- ostvaruje stalnu saradnju sa službom civilne zaštite općine u cilju rješavanja određenih pitanja koja su značajna za ostvarivanje zaštite i spašavanja ljudi i materijalnih dobara od prirodnih i drugih nesreća na području za koje je povjerenik zadužen, a u kojima se moraju

angažirati građani i preduzima aktivnosti da se osiguraju odgovarajuće prostorije za smještaj i čuvanje sredstava za kolektivnu zaštitu i drugih sredstava namijenjenih za zaštitu i spašavanje i stara se o ispravnosti tih sredstava;

- preduzima aktivnosti da građani provode preventivne mjere zaštite koje su od značaja za sprečavanje nastanka prirodnih i drugih nesreća koje mogu ugroziti život i zdravlje ljudi, stambene i druge zgrade i imovinu, na području na kojem građani žive, kao što je zaštita od poplava i eksplozija (plinskih boca, instalacija i drugih uređaja koji mogu izazvati nesreću), provođenje mjera koje se odnose na zaštitu okoline i druge aktivnosti koje su u funkciji zaštite i spašavanja na području za koje je povjerenik zadužen;
- preduzima mjere da se građani upoznaju sa znacima za uzbunjivanje i sa zadacima koje oni trebaju preduzeti kada se da znak za uzbunjivanje i osigurava da se u svim zgradama za koje su zaduženi istaknu na vidnom mjestu znaci za uzbunjivanje i
- vrši druge poslove zaštite koje odredi služba civilne zaštite općine.

2) u fazi spašavanja iz člana 49. tačka 2. ovog pravilnika, povjerenik provodi slijedeće operativne mjere:

- odmah po izbijanju prirodne ili druge nesreće, a u zavisnosti od vrste nesreće, preduzima mjere da građani pristupe zaštitu sebe, svoje porodice i imovine i da učestvuju u izvršavanju zadataka na spašavanju nastradalih i ugroženih ljudi i materijalnih dobara i da sve te aktivnosti preduzimaju prema naredbama štaba CZ koji rukovodi akcijama zaštite i spašavanja na ugroženom području,
- preduzima mjere da se provede naredba štaba CZ koji rukovodi akcijama zaštite na ugroženom području da građani daju sredstva kojim raspolažu, a koja se mogu koristiti u spašavanju povrijeđenih i ugroženih ljudi i otklanjanju posljedica od tih nesreća i vrši raspored tih sredstava prema prioritetima na područjima na kojima je njihovo korištenje potrebno,
- preduzima mjere da se građani angažiraju na vršenju zadataka koje naredi štab civilne zaštite iz prethodne alineje,
- preduzima mjere da građani provjere stanje ispravnosti svojih sredstava za ličnu zaštitu, a u saradnji sa kućnim savjetima, gdje su obrazovani, provjerava stanje ispravnosti sredstava za kolektivnu zaštitu i preduzima mjere da se ta sredstva dovedu u ispravno stanje.

3) u fazi otklanjanja posljedica iz člana 49. tačka 3. ovog pravilnika povjerenik preduzima sljedeće sanacione mjere:

- preduzima mjere da građani pomognu na saniranju onih posljedica koje oni svojim aktivnostima mogu sanirati, na području na kojem se nalaze njihove kuće, stambeni i drugi objekti i imovina, kao i materijalna dobra, što se obavlja prema vrsti posljedica koje su nastale na ugroženom području, kao i mjere koje naredi štab CZ koji rukovodi akcijama zaštite i spašavanja na tom području i
- vrši druge zadatke koje odredi taj štab.

#### Član 53.

Povjerenici civilne zaštite koji se određuju za jednu ili više stambenih zgrada, nadležni su za vršenje sljedećih poslova zaštite i spašavanja i to:

1) u fazi preventivne zaštite iz člana 49. tačka 1. ovog pravilnika, povjerenik obavlja slijedeće preventivne mjere:

- u saradnji sa kućnim savjetom i upraviteljem zgrade (u daljnjem tekstu: upravitelj zgrade) koji je zadužen za održavanje zajedničkih dijelova zgrade, preduzima mjere da se u stambenoj zgradi osigura potreban broj protivpožarnih aparata u skladu sa važećim propisima i da se ti aparati održavaju u ispravnom stanju, da se hidranti za vodu, ako postoje, održavaju u ispravnom stanju i da se osiguraju propisane količine sredstava za kolektivnu zaštitu građana te da se ta sredstva čuvaju na sigurnom mjestu,
- preduzima mjere da građani osiguraju propisana sredstva za ličnu zaštitu i da se ona čuvaju u ispravnom stanju,
- u saradnji sa općinskom službom civilne zaštite preduzima mjere da građani učestvuju na obuci iz oblasti zaštite i spašavanja, u skladu sa planom i programom obuke stanovništva i
- vrši druge poslove zaštite koje odredi služba civilne zaštite općine.

2) u fazi spašavanja iz člana 49. tačka 2. ovog pravilnika, povjerenik obavlja sljedeće operativne mjere:

- odmah po nastanku prirodne ili druge nesreće preduzima mjere da se građani u stambenoj zgradi angažiraju na spašavanju svojih članova porodice i svoje imovine i da uzmu učešće na spašavanju nastradalih i ugroženih građana u skladu sa naredbama štaba CZ koji na ugroženom području rukovodi akcijama zaštite i spašavanja,
- usmjerava i koordinira angažiranje građana na mjesta i područja koja su ugrožena i gdje je njihova pomoć neophodna,
- određuje sredstva i opremu građana koju oni treba da daju za korištenje u akcijama zaštite i spašavanja nastradalih i ugroženih ljudi i materijalnih dobara po naredbi štaba CZ koji rukovodi akcijama zaštite i spašavanja na ugroženom području.

3) u fazi otklanjanja posljedica iz člana 49. tačka 3. ovog pravilnika povjerenik preduzima sljedeće sanacione mjere:

- vrši uvid u stanje posljedica koje su nastale na području, odnosno na stambenim i drugim zgradama za koje je zadužen i utvrđuje vrste aktivnosti koje treba preduzimati na potpunom saniranju nastalih posljedica i o nađenom stanju upoznaje kućni savjet, savjet mjesne zajednice i općinsku službu civilne zaštite, predlaže preduzimanje potrebnih mjera i osigurava angažiranje građana na saniranju posljedica koje naredi štab CZ koji na tom području rukovodi akcijama zaštite i spašavanja i
- vrši druge zadatke koje odredi taj štab.

#### Član 54.

Povjerenici civilne zaštite koji se određuju u federalnim i kantonalnim organima uprave, općinskim i gradskim službama za upravu i drugim organima i pravnim licima nadležni su da vrše slijedeće poslove zaštite i spašavanja i to:

1) u fazi preventivne zaštite iz člana 49. tačka 1. ovog pravilnika povjerenik obavlja slijedeće preventivne mjere:

- u saradnji sa rukovodiocem organa uprave, odnosno službe za upravu, odnosno rukovodiocem pravnog lica obavlja slijedeće zadatke: preduzima mjere da se osiguraju potrebna sredstva i oprema za ličnu zaštitu državnih službenika i namještenika, odnosno zaposlenika, kao i sredstva za kolektivnu zaštitu i da se sva ta sredstva čuvaju na odgovarajućem mjestu i da budu u ispravnom stanju, da se osigura potreban broj protivpožarnih aparata i da se čuvaju u ispravnom stanju i da se državni službenici i namještenici, odnosno zaposlenici osposobe za upotrebu tih aparata i da svi zaposleni

prisustvuju obuci iz oblasti zaštite i spašavanja u skladu sa utvrđenim planom i programom obuke za ta lica i da vrši druge poslove od značaja za organiziranje i provođenje zaštite i spašavanja u organu vlasti, odnosno pravnom licu predviđene propisima.

2) u fazi spašavanja iz člana 49. tačka 2. ovog pravilnika, povjerenik obavlja slijedeće operativne mjere:

- odmah po nastanku prirodne ili druge nesreće koja je ugrozila zgrade i objekte organa uprave i službe za upravu, odnosno pravnog lica preduzima mjere da svi zaposleni pristupe spašavanju nastradalih i ugroženih ljudi i da spašavaju ugroženu službenu dokumentaciju i ostala sredstva koja pripadaju organu, odnosno pravnom licu,
- vrši koordinaciju i usmjeravanje zaposlenih na ona mjesta koja su ugrožena da obavljaju one zadatke koji su od značaja za spašavanje nastradalih i ugroženih ljudi, odnosno za spašavanje službene dokumentacije i ostalih sredstava u skladu sa narednjima rukovodioca organa uprave i službe za upravu, odnosno direktora ili drugog ovlaštenog organa pravnog lica,
- osigurava provođenje naredbi štaba CZ koji na ugroženom području rukovodi akcijama zaštite i spašavanja koje se odnose na organe uprave i službe za upravu, odnosno pravno lice u kojima je imenovan povjerenik.

3) u fazi otklanjanja posljedica iz člana 49. tačka 3. ovog pravilnika preduzima slijedeće sanacione mjere

- vrši pregled svih prostorija, opreme i službene dokumentacije i utvrđuje nastale štete, kao i stanje opreme i službene dokumentacije i o tome informira rukovodioca organa uprave ili službe za upravu, odnosno rukovodioca pravnog lica i rukovodiocu predlaže mjere koje bi trebalo narediti radi cjelovitog saniranja nastalih posljedica i postupka po naredbama rukovodioca.

#### **4. Način rada povjerenika civilne zaštite**

##### Član 55.

U fazi preventivne zaštite povjerenici civilne zaštite, poslove iz svoje nadležnosti koji su utvrđeni za preventivnu zaštitu, obavljaju na slijedeći način i to:

1) povjerenici civilne zaštite iz člana 52. stav 2. tačke 1. ovog pravilnika, poslove iz te odredbe za koje su zaduženi obavljaju u saradnji, uputama i pod nadzorom službe civilne zaštite općine, kao i u saradnji sa rukovodiocem mjesne zajednice na čijem se području nalazi naselje ili dio naselja ili selo i zaselak, za koje je povjerenik zadužen.

2) povjerenici civilne zaštite iz člana 53. tačke 1. ovog pravilnika, poslove iz te odredbe za koje su zaduženi, obavljaju u neposrednoj saradnji, uputama i pod nadzorom službe civilne zaštite općine, kao i u saradnji sa kućnim savjetom i upraviteljem zgrade.

3) povjerenici civilne zaštite iz člana 54. tačke 1. ovog pravilnika, poslove iz te odredbe, obavljaju u neposrednoj saradnji i po uputama rukovodioca organa uprave i drugog organa vlasti, odnosno pravnog lica i u saradnji sa službom civilne zaštite općine.

##### Član 56.

U fazi spašavanja i fazi otklanjanja posljedica nastalih od prirodne ili druge nesreće, poslove iz svoje nadležnosti koji su utvrđeni u odredbama čl. 52. do 54. ovog pravilnika, povjerenici civilne zaštite obavljaju na slijedeći način i to:

1) povjerenici civilne zaštite poslove iz tač. 2. i 3. člana 52. ovog pravilnika, počinju vršiti od momenta saznanja da prijete opasnost od nastanka prirodne ili druge nesreće na području za koje je zadužen ili je nadležni organ proglasio nastanak nesreće, odmah preduzimaju mjere i aktivnosti da građani pristupe zaštiti i spašavanju ljudi i materijalnih dobara koji su ugroženi ili mogu biti ugroženi nesrećom i rukovodi svim aktivnostima na području za koje su zaduženi i u tim aktivnostima osigurava provođenje naredbi štaba CZ koji na tom području rukovodi akcijama zaštite i spašavanja. Te aktivnosti se preduzimaju sve do momenta dok štab CZ ne naredi prestanak aktivnosti.

2) povjerenici civilne zaštite poslove iz tač. 2. i 3. člana 53. ovog pravilnika, počinju vršiti od momenta saznanja za nastanak prirodne ili druge nesreće, odmah preduzimaju mjere da građani pristupe zaštiti i spašavanju svoje porodice i svoje imovine i da drugima pruže pomoć u spašavanju ugroženih ljudi i materijalnih dobara i neposredno na terenu rukovode tim aktivnostima, s tim da u tim aktivnostima postupaju prema naredbama štaba CZ koji na ugroženom području rukovodi akcijama zaštite i spašavanja i osiguravaju provođenje naredbi tog štaba. U obavljanju tih aktivnosti povjerenici ostvaruju i stalnu i neposrednu saradnju sa kućnim savjetom i upraviteljem zgrade, u cilju spašavanja ugroženih i nastradalih ljudi u zgradi, kao i spašavanja sredstava i imovine koja je ugrožena.

3) povjerenici civilne zaštite, poslove iz tač. 2. i 3. člana 54. ovog pravilnika, počinju vršiti tako što preduzimaju mjere da se službenici i namještenici u organu uprave i službi za upravu, odnosno zaposlenici u preduzeću, ustanovi i drugom pravnom licu za koje su zaduženi, angažiraju na spašavanju ugroženih ljudi i službene dokumentacije i materijalnih sredstava ugroženih prirodnom ili drugom nesrećom. U toku trajanja tih aktivnosti, povjerenik ostvaruje stalnu saradnju sa rukovodiocem organa uprave i službe za upravu, odnosno sa rukovodiocem preduzeća ili drugog pravnog lica i postupa po njihovim nalogima, a istovremeno osigurava da se postupa i po naredbama štaba civilne zaštite koji na ugroženom području rukovodi akcijama zaštite i spašavanja.

## **5. Organiziranje i rad štaba CZ grada i povjerenika CZ**

### **Član 57.**

Odredbe ovog pravilnika koje se odnose na organiziranje i način rada općinskog štaba CZ, kao i povjerenike civilne zaštite koje određuju općinske službe za upravu, analogno se primjenjuju na organiziranje, zadatke i način rada gradskog štaba CZ i povjerenike civilne zaštite u gradskim službama za upravu i drugim gradskim organima.

## **V. NADLEŽNOST ORGANA CIVILNE ZAŠTITE KANTONA I OPĆINA PREMA ŠTABOVIMA I POVJERENICIMA CIVILNE ZAŠTITE**

### **Član 58.**

Kantonalne uprave civilne zaštite dužne su, u okviru poslova iz svoje nadležnosti, stalno preduzimati odgovarajuće mjere i aktivnosti da se u kantonalnim organima uprave i drugim kantonalnim organima vlasti, upravnim organizacijama i pravnim licima iz oblasti privrede i društvenih djelatnosti koja spadaju u nadležnost kantona, organiziraju štabovi CZ, ako su potrebni, odrede povjerenici civilne zaštite i utvrde njihovi poslovi i način rada, u skladu sa odredbama ovog pravilnika.

Kantonalne uprave civilne zaštite imaju obavezu da pružaju stručnu i drugu pomoć organima i pravnim licima iz stava 1. ovog člana u vezi organiziranja i osposobljavanja povjerenika civilne zaštite.

#### Član 59.

Služba civilne zaštite općine dužna je, da u okviru poslova iz svoje nadležnosti stalno preduzima odgovarajuće mjere i aktivnosti da se u općinskim službama za upravu, naselju, dijelu naselja, ulici, selu i zaseoku na području općine, odrede povjerenici civilne zaštite, da se utvrde njihovi poslovi i način vršenja poslova i da se osigura odgovarajuća oprema i tehnička i druga sredstva potrebna za njihov rad.

Kantonalne uprave civilne zaštite imaju obavezu da stalno ostvaruju saradnju sa službama civilne zaštite općina na području kantona i da tim službama pružaju stručnu i drugu pomoć na obavljanju poslova iz nadležnosti tih službi i da zajednički rješavaju sve zadatke od zajedničkog interesa za kanton i općine, kao i pitanje osiguranja sredstava za naknade iz člana 60. stav 1. ovog pravilnika.

#### Član 60.

Za povjerenike civilne zaštite iz čl. 52. i 53. ovog pravilnika, služba civilne zaštite općine ima obavezu da utvrdi odgovarajući iznos mjesečne naknade za njihov rad u svojstvu povjerenika civilne zaštite iz sredstava koja se formiraju na osnovu člana 180. Zakona o zaštiti i spašavanju i iz budžeta općine.

Za povjerenike iz člana 54. ovog pravilnika, naknadu za rad povjerenika civilne zaštite utvrđuju rukovodioci organa uprave, službi za upravu i drugih organa, odnosno direktori u pravnim licima iz vlastitih sredstava.

Štabovi CZ utvrđuju visinu i uvjete za naknadu članovima štaba CZ za rad u štabu iz sredstava koja su osigurana za rad štaba CZ, a za štab CZ mjesne zajednice naknadu utvrđuje općinski štab, iz svojih sredstava.

Sve aktivnosti na određivanju uvjeta i visine naknade za štabove CZ iz stava 3. ovog člana pripremaju nadležni organi civilne zaštite u saradnji sa komandantom štaba, a odgovarajuću odluku o tim pitanjima donosi štab CZ.

Kantonalna uprava civilne zaštite dužna je iz svojih sredstava formiranih prema stavu 1. ovog člana pomoći općine koje nemaju dovoljno sredstava za povjerenike iz stava 1. ovog člana. Tu pomoć može odobriti i Federalna uprava.

Visina naknade iz st. 1. i 3. ovog člana određuje se u visini do 15% od prosječne neto plaće ostvarene u Federaciji u prethodnom mjesecu, prema saopćenju Federalnog zavoda za statistiku.

#### Član 61.

Naknada za rad povjerenika civilne zaštite i članova štaba CZ iz člana 60. ovog pravilnika utvrđuje se rješenjem koje donosi:

- 1) za povjerenike civilne zaštite iz stava 1. rješenje donosi služba civilne zaštite općine,



2) za povjerenike civilne zaštite iz stava 2. rješenje donosi rukovodilac organa uprave, službe za upravu i drugog organa, a u pravnom licu direktor ili drugi nadležni organ određen opštim aktom pravnog lica,

3) za članove općinskog štaba i štaba CZ mjesne zajednice, rješenje donosi služba civilne zaštite općine, a za članove Federalnog i kantonalnog štaba, rješenje donosi nadležni organ civilne zaštite, u skladu sa odlukom štaba iz stava 4. člana 60. ovog pravilnika.

#### Član 62.

Naknada za rad povjerenika iz člana 60. st. 1. i 2. ovog pravilnika osigurava se samo za fazu preventivne zaštite iz člana 49. tačka 1. ovog pravilnika, a za članove štaba CZ naknada se osigurava za fazu provođenja priprema iz člana 3. stav 1. ovog pravilnika.

Za vrijeme učešća povjerenika civilne zaštite u akcijama zaštite i spašavanja i u fazi otklanjanja posljedica iz člana 49. tač. 2. i 3. ovog pravilnika, a za članove štaba CZ za vrijeme vršenja operativne funkcije iz člana 3. stav. 1. tačka 2. ovog pravilnika, naknada se ostvaruje u skladu sa odredbama čl. 186. do 189. Zakona o zaštiti i spašavanju i propisom donešenim na osnovu člana 187. stav 1. tog zakona.

## VI. PRIJELAZNE I ZAVRŠNE ODREDBE

#### Član 63.

Organi civilne zaštite kantona i općine dužni su u roku od šest mjeseci od dana stupanja na snagu ovog pravilnika izvršiti slijedeće zadatke i to:

1) kantonalna uprava civilne zaštite - da organizaciju, sastav i način rada kantonalnog štaba CZ i određivanje povjerenika CZ u kantonalnim organima uprave i upravnim organizacijama usklade sa odredbama ovog pravilnika,

2) služba civilne zaštite općine - da organizaciju, sastav i način rada općinskog štaba CZ i štabova CZ u mjesnim zajednicama, kao i određivanje povjerenika u mjesnim zajednicama i općinskim službama za upravu i drugim organima općinske uprave uskladi sa odredbama ovog pravilnika.

#### Član 64.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

---

Broj 01-02/2-428/06  
13. novembra 2006. godine  
Sarajevo

---

Direktor  
**Alija Tihć, s. r.**

---